

藏

密

齋

集

藏密齋集卷之二十一

嘉善魏大中孔時著

書牘九

上高老師

尊體小德耶此中酬應亦復勞人也久懷遯思
以左浮丘未出強顏于此算來各人身上畢竟
各人自要照管十分隱忍苟且不得若有心世
道者從旁出正議糾之當事據以處分則邪氣
尚不敢干何也此人着數低先要汲汲自解通

丙之醜卽邪氣已自不旺宜無有和者和者亦
低不足慮也文選考功郎河南道皆不拘資俸
獨長垣猶拘拘于此不肖計于小疏中帶入此
意部卽據此以覆亦不患長垣之無人也如何
如何

甲子七月十三日

與潘茂先。

人須自揣有用于世則當留無用于世則當去
無損于已則當留有損于已則當去僕量褊而
才短此其無用于世明矣無用于世而忍詬以

居要不有損于已乎此僕之所自審也砥世論
節救世論材無材寧不失已焉耳然丈且爲僕
秘之僕恐以牽及有用于世之人也同事而所
處不同此毫釐之辨如何如何

甲子七月十六日

答王玄珠

廣西按院

一時以乳媪去國者不用其言而悉登之卿寺
迺猶滯年兄于西粵則猶行年兄之道于西粵
也非久卽啓事矣一以馭夷一以馭土又增兵
爲馭究且又將馭兵馭不勝馭而粵西之可以

爲亂者日滋將奈何弟之不合時宜年兄所知
且先秋而搖落也

甲子七月十六日

答宋念義

陝西撫院

不肖以爲天下事天下人了之遂竊竊焉不勝
繼衣之好得之耳目鑄之心提之日無徃而非
是也夫亦謂仕路清明政事振舉庶幾太平之
理耳而今舉以爲罪案矣數奉教于君子稱台
臺者尤勤卽不肖之鑄之心而提之口者尤勤
也顧未嘗有剡薦事竊見輦下諸公不無以此

酬人事者以謂心誠好之卽勤勤焉至再至三
實用之而已耳故生平注好賢者而未嘗薦一
人未嘗薦一人而復以薦賢得罪竊爲賢者甘
之矣

甲子七月十八日

答譚凡同

山東海防道

卽不能時親光霽而遇有難處之事與難料理
之地方意中口不自知其何以咕咕不能置
也其詢人材于吾鄉者必屈指台臺以爲重而
人亦信之非不肖之言足信則台臺有以信不

宵之言也所藉光寵多矣階庭玉樹森森如荀
龍長公幸嘗荆識近刻益奇邃粉耻藉光正未
艾耳

甲子七月十八日

與馮振鷺

重爲台丈思之台丈在尊公事不患其不自恐
未可驟白也頃申玄渚疏雪文定反以滋議徃
張陽和先生白其尊人被讒弟多怨于人伺弟
者殊亟恐人撫以爲弟罪將反以累尊公張誠
老爲冢宰而白其尊人遂得白孝子之用情期

于得當不患無時也辱愛敬布其愚伏惟裁釋
甲子七月廿一日

答高明叔

人所以不肯爲善以爲善不樂認苦趣是樂耳
足下拈以名編更爲古人開一翻生面也持已
訓子孫不知不覺中撥動得看書人良心其功
不小小暇當艸數語以附不朽不敢負諾

甲子
七月廿一日

答饒鄴明

廣東布政

白艚閩粵之大害大害也亂民無上而所犯者
閩之人情可知已台臺未嘗不與同息而庫銀
無失則所全者大朝端公論自明也台既不敢
登藉手附壁併謝

甲子七月廿一日

答錢昭白

李司馬每晤必及年臺謂于此地任勞任怨之
已久也津撫兼餉之議甚善然消息杳如當事
者似美其辭以復云耳苟有機會要不敢不竭
其區區也屯撫疏卽抄叅過部矣張弁俞胥具

蒙垂盼爲荷俞身因家破皆以沈師故可念季
彪當與商之犬馬之齒無聞爲愧敢煩腆覬耶
然高情心載之矣

甲子七月廿二日

與錢昭自

俞文向爲香河胥玉臺師之喪周旋頗力事竣
爲怨家所指傾其家弟及令兄共憫之而未
有路也索弟書謁年臺者數年弟不之許日來責
諾不得已授簡介之年臺量其材而用之以酬
師門之義幸甚

甲子七月廿二日

二ノ言月
答周衡臺。

兩誦至教具見長者燕居澹念然妥貼甚難豈
有宵中多塊磊而世界乃得平貼者狂狷之取
效所以不如鄉愿也元禮就北寺獄頗引宦官
子弟宦官懼請以天時肆赦而今可得耶其縱
若天縱之其操吾不得而操也首揆足未出國
門而議者輒隨其後獨未有訟言及妖狐者海
客朝陽一鳴彼卽斥言其敢其所憑藉可知也
弟不肖爲世道累懼牽及同人行行且止然久

此將益累世道日思南山之南北山之北耳

甲

子七月廿二日

上高老師

不肖千思萬算恐併不得爲硜硜之小人耳滯
此數時定成絕物可懼入暮當剖懷請教第恐
尊體覺相對爲煩也

甲子七月廿三日

答程肖莪

河南撫院

民猶魚也魚在于沼亦匪克樂今日之謂矣何
以撫之台臺二十餘年之靜觀必有以得其機

二十餘年之靜養必有以得其本今直舉而措之爾拭目而觀中土之民圍圍焉洋洋焉而攸然而樂也如在濠之上也

甲子七月廿三日

答朱恒岳

四川總督

奢安弗靖人有幸不幸而無不詡爲奇節爲奇功也西南半壁獨倚台臺如長城首首卽未竝倖業不敢易種于其故土乃廟堂之上若甯使相以待太原之下者然公議方隳焉于彤弓之饗宜右以一朝廼台臺歆焉于疆事未竟載寵

臣厚也其功高于殉節者其厲功又高于其有
功者不啻什伯也粉社姓名苟在輦下無不斷
斷焉在人之齒牙幸而立四極者如鰲足焉不
能舍也台臺其首矣

甲子七月廿三日

答張誠翁

荷以先兄之雅時辱甄陪忝竊省垣沐愛更渥
謂擬差竣還朝朝夕左右庶幾人情事體不卽
謬迷而高識遠舉已尋兩疏之轍返東山之駕
矣敝鄉許少翁品望亞于翁臺而不得出葉台

翁宜無憾于世矣一出國門而議隨其後知翁

臺所得于天與天之厚翁臺者非偶然也

甲子

七月廿三日

答丁養凝

令叔祖甫儲義倉之粟而天卽應之凶年其以此彰盛德耶然民不堪命矣卹典俱妥副榜論其自今以徃者耳不追論也

甲子七月廿四日

答喻養初

遼東撫院

夙聞台臺擁皋比而說易白安舜鄰諸丈又每

好稱說台臺故當事者問人物于吾鄉必借台
臺爲光寵而遂以遼界台臺此遼之幸非台臺
所難而非初心所圖也往者原非遼之難圖難
于其共與圖遼者耳千秋舊譜得策屯田今遼
有流民遼多曠土此其時矣曩者拜教亦謂歸
遼人田遼土清野以待勿徒吾輜重而與之近
而近有調兵之議將以何圖費行糧騷驛遣令
其棄妻子而來以父兄衛我此必得之數乎士
夫相對恐恐焉懼其有出師之議也特有台臺

在耳

甲子七月廿四日

答許華芝

福建建南道

徃有大憝圖濫司隸之銜以肆其毒臺下持憲
典格之蓋今日而誦臺下之功者如雷否者其
流毒不迨今日也少微先生靜觀冲意思如何
便中爲一寄言珍重珍重

甲子七月廿四日

與胡浮治

宣大按院

弟杜門之日多不得時請教益聞且行矣何能
爲懷弟在舊署時嘗捧冊而封樂昌于朔今年

凡所巡地也微聞以左右不法被法誠不法也
寧可骹法以憂小民但願于拔薤之中少全其
藩體耳不得躬別伏惟珍重

甲子七月廿四日

答劉東卿

生平無他長獨嚮徃海內英賢如渴乃以蘭位
聲交臂而失賢者悵快何如仁丈此行與日月
爭光矣入楚者亦未有過賢者之闕而不起而
賦焉者也

甲子七月廿四日

答陳如葵

人之信毀也易于信譽而人之譽人也又不能
如毀人者用意之深今日而始得當以報臺下
使者當微知之似葉之身候逢搖落儻不卽墮
良晤非遙不一

甲子七月廿四日

答樂昌王。

每辱遠念感荷不淺所委當卽致之恭儉美德
也子輿氏以不侮不奪爲恭儉之實大藩夙敦
禮讓而以小嫌招釁抑豈有依艸附木者不無
小有侮奪于民間羣小收以爲利而大藩代受

其名乎此不可不察也伏惟留意

甲子七月廿四日

答趙岐陽

端木氏問好惡于鄉人實致疑于好而微領其
妙于所惡鄉以爲原聖以爲賊所從來矣白沙
詩云羣譏衆訕尋常事聊取男兒一世中淡有
味乎新言亦淡有愧乎斯言過辱遠念不勝踈
踏長者抑憐其同病耶石刻見惠古文奇字鐵
畫銀鈎儼如蒙雨登衡山巔讀岫嶠碑一時寄
托不在人間世也

甲子七月廿五日

答申玄渚

文定一時之苦心黠者翹以爲名而一時忠謹之士和之當日白之之難不如當日和之之易當日和之既易今日白之尚難所以布其區區于令姪年兄也翁臺近疏出于不得已而仍有起而申其前說者亦若出于不得已然已在

聖鑒矣可以忘言也

甲子七月廿六日

答霍韻衛

陝西按院

中朝不勝異意異意則多口多口則廢時所賴

繡衣之使褰帷四出爲皇家立四極耳此可以
無所不爲而不虞其異意者也何狡虜飢軍貪
吏窮民之厯淡念哉虜不得逞其狡吏不得恣
其貪軍無飢而民不窮又總在年臺淡念中矣
甲子七月廿六日

答毛振南

海外之捷幾無虛月心鬼不禡六類不殄乎黃
爲廟社所大憂將軍卽廟社所淡仗矣獻俘告
馘事出希有有功貞役紀錄陞賞此國家所以

酬功將軍所以鼓衆也豈有靳焉將軍處鮮
之間利害共之知將軍所以籌鮮者甚苦廟堂
之上誦書生之常論以聽將軍亮將軍所處甚
難也彼中事姑置勿論吾遂可信而可仗乎伸
縮妙用尚賴權衡一旦颺去甚且叵測貽患持
常論者將責信于將軍不可以不深思也遼陽
初陷時氛正熾將軍挾死士出鎮江告捷獻俘
幾于定遠戶牖厚德寧能一日忘無知耶而廣
寧之陷罪負不赦必將軍一旦以尺組繫逆奴

父子之頸而獻之闕下推其始事或可赦原今
日未可徼恩也都中翕翕謂將軍寔有意圖利
之且疑若儔之有意于將軍也此亦不可以不
深思也將軍功在海外爲國功臣爲國重臣爲
國信臣僕忝在桑梓隔在海外不敢不盡以所
聞相告願將軍之一意于奴也寬鎮間屯種之
業如何地日擴軍日飽茲爲長筮曩者文遊擊
以書命藥參見惠參不敢登病冗中書亦未皇
裁答復承信使下存故敢抒其縷縷統祈鑒在

不宣

甲子七月廿八日

答張存宇

不肖方負世大誥，迺不見外于賢者，遠辱芳訊，
耶竊以觀世竊以問心矣。所教爾貴座師當商
之主者爲台丈圖門牆之誼，匆遽中不能詳也。

甲子七月廿八日

答劉貞白

直隸按院

呂梁久矣其爲桑田矣。彭城不陸沉耶？國家未
嘗無治河之費而不用之，河亦未嘗無治河之

法防河之夫而不事其事徐之所以有今日也
徐其沼矣陵寢奈何吏部未嘗一日不陞官地
方則無官內轉者不俟憑外官則日求改憑未
幾則又言資言俸言例求轉求內不休民豈得
安吏豈得不爲暴也頃甫厲餽遺之禁而霍丘
首犯之且一封至六十金寧不足賊民間六千
餘畝之遼餉耶其官之貪暴必矣旦日徼 旨
仰重台臺固台教所云剝元氣中之一人而鑽
天之手尤堪髮豎者也

甲子八月初一日

答董定所

身如秋葉偶未墮地亦欲于枌社中一點綴其
青黃而人桀榆之謂爾飄蓬耳圖爲葛藟之庇
耶何絮絮也數日間正苦甚而不可自明啞子
喫黃連自苦自知耳台臺就一冷缺而數熱人
圖之卽有數十熱人與共圖之鄙念不冷恐鄙
口不靈也

甲子八月初二日

答程激源

保定撫院

中不肖其喋玄黃之向者數數矣荷台臺筦計

陰氛廓清庶幾蕩平之理而滄訛簸弄輿鬼與
戎復以不肖爲難端不肖其不祥之人也哉顧
其所彈射獨以不肖于當世賢豪不勝緇衣之
好爲罪何所不坦懷而受之矣三五正人幸不
卽去不肖罪當去又執我仇仇未得卽去恐愈
以澣莽伏者之毒毒再發其旣滋大何以刈萌
何以塞衅無傷當日廓清之苦心之妙手也此
中言吏治者十五聽聲十五計實卽十五不足
盡憑獨仗台臺耳嗣或有聞不敢以不告

甲子

八月初七日

答畢東郊

鄧陽撫院

中不佞初不知片念緇衣之好之足以賈怨而招讒也夫使海內賢豪盡得與而駕夔龍之侶踰嶮如玉筍宇內多故諸奇杰雲蒸碁布于四陲不肖卽槁項林壑不有餘快耶若旁觀者與其求之而不得者不勝伎而得與者乃不知其所自政如隆冬寫薑汁于溫泉中飲之自煖而自知也持此以取怨于世無悔台臺以爲如何

郎事台臺饒爲之猶爲小用台臺也

甲子八月十一日

答楊大豫

河南按院

計期必逼矣。徃時計吏獨以貪者不必處處者不必貪。故無以風世勵俗而救百姓兩河之吏。真廉者真貪者舉在年兄藻鏡中矣。計必有越耳目之近而與百姓同其好惡者。茲計典之光也。弟卽不能久於此。要之爲計典非以爲弟亦年兄自爲也。

甲子八月十二日

答賀立菴

山東學道

八書續

卷之十五

以弟自量其于世乘雁雙鳧耳不殄瀝愠殊不自解又小臣屢荷明旨不敢自遂亦緣時有不測不得不以此身之生死去留悉聽之天辱遠念深自愧也台臺以課士兼課吏與專職課吏者稍不同首俸自當榮擢行與袁熙宇計之

甲子八月十二日

答朱恒岳 四川總督

翁所駐古鞠躬盡瘁者所謂不毛也天下無地不兵革無人不旂常而蜀爲嚴王者亦日念翁

臺之功之未酬也圖歸翁臺于中樞前勞未竟繼者難其人又圖加正卿銜以竟前績議未定然知翁臺之圖蜀者甚于中朝之人之圖蜀也
甲子八月十三日

答吳長谷

廣西按察使

向在棠陰之下不肖不敢旅諸孝廉而進謁也覆我戴我而若忘天地之大者然其父老額手而頌老公祖之德不衰則三邑田糧迄今鐫入附藏也黠者幾毀廟貌以報舊德則不腆敝邑

貽感于老公祖滋甚方愧未嘗以賤姓名通其
區區何辱遠念惠之顧問耶蜀功其白厯厯以
常調相酬又其地遠惡幸太君子不于國家銖
銖兩兩耳前以計典故藩臬之長槩未擬擢恐
尚有數月淹也迺瓌望偉伐在人耳目久矣
子八月十三日

答練任鴻

清院

年兄爲漕事良苦缺官之患陞者不至地方在
地方者輒又陞去甚矣世人之好官而又不

做官也大瑞之既外無楊內無張發之早又發
之盡故毫無益于事獨藉一人之死稍撥其良
稍安在廷之一息然外之入而構者未嘗一息
寧也等敘謂其罪不專在內洞如觀火矣貴鄉
新銓定矣從貴鄉之議也

甲子八月十四日

答黃闇齋。

跽讀裏言拳切拳切雙南兄復備道年兄所以
念弟者殊擊也李懋老誦年兄之躍然劃然沛
然者甚快年兄所以爲豪傑之士也夫豈待文

而興哉聞尊駕暫止都外得以旦夕奉教矣
甲子八月十四日

答張海澄

平陽守

與心統兄別云年兄文章之司命但計前有停
陞之說姑徐徐云爾中柱兄殊無休沐意所教
王令謹識之台鑒如秋水况其習焉者也弟無
似難乎免于今之世爲兄弟憂何以教弟耶知
愛如年兄而鼎臆亦不敢當恐生異同也

甲子

八月十五日

答劉心統

山西按院

弟孤且孱何能嬰兒人之鋒幸所謂兇人者走
媚竈之徑以圖必勝之着弟故于時無不負而
常勝者乃可持之以對千古也呼跋霜露莫必
其性命弟不敢畱又不敢不畱且爲撞鐘之僧
生死予奪聽之耳如何如何邇之爲兇人者其
計更狡進百官之圖使內之人次第自爲驅除
而彼邈之于無形無聲弟其可以免于今之世
乎晉年兄舊游地于吏治必有得其肯綮者真

廉真貪何以越耳目之近而與百姓同其好惡耶羅年兄之質在三代而上偶效三代而下事議遂不果今如貴鄉議用心槩年兄亦年兄所許也

甲子八月十五日

答丁改翁

恩典俱已完美家鄉大水行復屢仁人之用心矣吾邑災准十分更微改折之旨甚幸第計部尚不無小小齟齬以太倉粟支不及一年故也勢牽既呈未遂初衣侍教之懷徒有神選

甲

于八月十六日

答錢御冷

每展讀一翻惠書卽服朗識如觀火券在今日
于義不可言歸于勢不可言歸于禍機不可言
歸踴高天踏厚地做和尚則撞鐘已耳毀譽予
奪生死不敢問也人情誠如尊論不容弟一日
安于朝廷之上第原未嘗爲一日苟安計何怪
乎人情彼中以中旨礙手者今更翻一局陽出
口攻之而陰救之盡朝士之賢者否之否之冊

授之而陰令以他事細事驅之除之如近日院
堂署印之類是也顧教之未嘗不出口攻之知
言知人此際頗難之矣幸今之爲振瑾者不能
自爲振瑾一一仗惇確指點指點未到旣亦少
寬然惇確亦已甚矣得地得朋堅冰將至無可
施救解也好與侗初迂者又好言與弟善是弟
苦事然弟生平不受人指使亦不爲指使人事
若若是非非更不敢妄隨人也梅梁事在地方
地方自有定論也令弟勞于津良久常調則非

以酬勞破格則難于啓事奈何奈何諸可知者
邸報具之邸報所不能具者皆不能悉也

甲子

八月十六日

付淨兒

中是常事不中亦是常事中不中願俱以平常
處之我處此不爲終日之計而不引病此官非
引病之官此時非引病之時也予奪一聽君
恩耳自發霍丘之餽門無苞苴私意原謂不能
禁京官之不受但期外官之不餽庶官評稍清

計典有禪耳今出門面面相看微有怒色或者
行仁義旣效也笑笑家鄉大水幸已得 旨改

折我家有擔租可以供明年之飯否有子錢可
以供明年之用否勾過日子可寬處稍寬之諸
窮親如何度日我力不能助爲愧濂洙作何狀
五柳先生可不賦責子詩乎長康可畱畱之吾
力能豐稍豐之沈高之歸看浙中小錄爲遲速
也

甲子八月十六日

與黃石齋

坐誹訕中不敢以形跡過存相累不知其清恙
註籍也展讀宏篇病中所得固多矣謝謝承以
爲寶

甲子八月十六日

答李玄白

王季常稱翁臺爲海內人倫冠冕季常非妄言
人者也何方不兵革何人不旂常徐淮叙績至
再而矜矜焉抱功不酬賞之懼勞謙藹如茲不
以盡翁臺茲亦以見翁臺矣

甲子八月十七日

上趙儕翁

查品級考僕少得升太常光祿太僕卿敝鄉劉
念臺似宜于三寺中以一鄉起之咨催疾來人
言大中于鄉情薄同鄉有一劉念臺而聽其肥
選不轉不以聞于翁臺斯真薄也已矣夫念臺
天下士大中實非以同鄉故可以即日啓事乎
顯候台指停推陞一議更祈文部堅持之

甲子

八月廿一日

答劉心虞

河東鹽院

別後卽違多口自意如葉之身先秋而墮抱病

索居一切酬應俱不省理華札見在亦復停閣
至今意況可知也乞歸不得又小臣不敢自遂
且恩威不測更不敢不踟躕處此所謂執我仇
仇也年兄愛我何以爲弟計耶

甲子八月廿三日

答祝惺存

淒風蕭寺足音窅然迄今思之猶有餘韻人言
湖運否台臺四十年不以莊牘繁筐事世貴而
此銀艾者依然四十年也何言否耶設橫金曳
緋都顯庸矣而省所繇來以莊牘繁筐得之無

論世有笑罵我者我還而自顧併顧其爲我僕
僕而傳牘承筐者願得無泚歟此際而脈脈自
喜也子輿氏云不得志獨行其道志有得有不
得道固無不行時矣要知抱其獨者如何耳舉
世而盡台臺其人道何所不泰然耶夫又不有
莊牘繫筐以事世貴而併其銀艾失之者卽位
亦未爲不泰也台臺不以莊牘繫筐事世貴不
肖不以莊牘繫筐取世資以自附于聲氣之末
台臺許之乎顧世無四十年于銀艾者四十年

而有不_必莊牘繁_雀之一年可仍以銀艾_事可
臺乎命之矣但機緣不知何日也
甲子八月廿四日

答王葱嶽 浙江撫院

司農_詘計無復之不告之天子不_參之朝議不
謀之撫按私以其意于雜項中加一百八十萬
于天下而漸得二十四萬焉諸郡國竟有如其
指者粵西以二十萬進何不為西粵圖其繼與
後之繼撫粵者圖其繼也_鯁焉為其民請命
者獨老公祖及程澈老耳養百姓所以賴大賢

也大疏失抄接翰教始索之則部已具覆徵

嚴旨矣從司垣者丐補叅以 旨過峻尚有十

之七語非必實以七解也洪水降割荷老公祖
特疏凡被蓄十分者已得全折而司計者難之
勘疏至尚須有一翻講折漕折而遼米不待言
矣何也無舟可運也妄之遼米一說卽豐歲有
當議者天下每因一畝派遼餉九釐散鄉獨每
畝派米一升准銀約五六釐外仍徵銀三四釐
其米又加糶米耗幾與其正等縣官又爲措運

費無額編良苦是天下之遠餉每畝九菴而敵
鄉幾倍之司垣者倉卒未領其意此米終當折
耳敵邑康父母俸已及期平湖如得免覲其才
固可以兼敵邑之篆也

甲子八月廿七日

答田陸海

浙江鹽院

浙西三郡江南四郡本塊土而分履者二之各
餒爲政痛癢不接庚申非潦非旱獨以京口之
米舶不入而常蘇而下米賈騰涌幾致旣變此
其徵矣今日水蓄彌望潢池伏戎其可虞有甚

于往日者救災弭盜通七郡之血脈而圖邈之
待老公祖在可無各自為政之慮又撫其地者
竝一時高賢如左右手也漕兌一事聞顯屬之
老公祖撫臺公祖疏十分被災之處徼 旨改
折而司農尚難之勘疏至須力持之漕米改折
而遠米不言而喻矣無漕艘可攜也

甲子八月
廿七日

答樊鐘陽

兩淮鹽院

殫天下而奉東北之渴息不足思取足于無名
之徵年臺于弊孔出孔乎方清查樽節以佐司

農之亟用心良苦度其能爲可繼否也弟嫉惡
則以嫉惡取罪好善則又以好善取罪旦夕又
未能釋此而去罪將日積誦正色主持大度包
荒八言錫弟良規非曰能之願學焉謹奉爲弦
韋也謝謝

甲子八月廿八日

答黃闔齋

專愚之人愆尤自取乃以爲知己憂貴座師于
世道良苦天下事直捷行之亦無所用苦然徑
情則又多愆尤如弟矣苦中知自有苦味也每

聞長者言律凡仁至義盡年兄悉心此道以處
天下沛如矣以任灣作居山課甚善世變倏忽
今日之唯弟者明日未必不以爲否要之貴座
師足仗也年兄又自有其可仗也

甲子八月廿九日

答蔣澤壘

陝西按院

老父母巡方良苦又以弟疾藜之據爲老父母
憂台教謂弟處進賢之地人故仗之則弟之好
賢亦已不啻如飢渴矣何庸仗也向賢者不可
多得百官之富其塗亦甚寬何庸仗也世固不

能常泰而無否而弟以身開其否弟所以自愧
自憾也傾否以俟老父母之還朝矣

甲子九月初一日

答陸太和

貴州按院

巡黜無擇地其巡黔則有擇而避焉者矣當事
者議以兼差爾其勞台臺按黔則又以兼勞半
其差雖賢者不言勞然廟議無不稱勞而酬者
也王彭伯儋黔事持議者謂其死不足以贖誤
國之罪况未必死讀大疏則彭伯信死矣所糾
張節推無論其他觴諸隸而身歌以侑之可以

復蒞民稱官長乎止言降調于考功法猶寬政

矣

甲子九月初一日

答畢白陽

嚮者翁臺以精覈之政乘寬大之後壯哉雀鼠
亦復賄賄况不肖藐然之軀而當其憑社者哉
必無幸矣初衣未遂松菊撩思白眼紅塵雞肋
亦何味之有臨讀翰教一丘一壑若澗有意乎
不肖而招之俱隱也南山之南北山之北夢所
繞夫亦其性所近矣翁臺方柱礎一時旂常百

世何得以四載津門賢勞興咏耶八年丁外三
過不入不肖又舉以頌翁臺也資獻品望輿論
共歸弓旌之招知不在遠卽圖津門而未有能
繼之者亦必有以重翁臺如袁侍御疏所云云
也

甲子九月初二日

答李燦岩

甘肅樵院

其在今日似以度外置之而置台臺于其火首
雖伏銀首喙息以獲有寧宇則當事者所以善
置其也馮涼州以官評致議事甚細台臺多方

左右之爲寒邊郵才如此而有才不爲台臺用
耶其得終庇宇下則台臺賜也

甲子九月初二日

答李心白

南頓撫院

以景風徽寤寐思服比陪輦轂之下而一再相
接以還未獲進而深言其所以迄今俛俛仍又
徒徃來于寤寐也中不肖取伎于世實甚顧何
如台臺見伎于異日時觸邪指佞獲報必奢屈
軼幸生于堯階耳非然者誰許之當門而不鋤
也四郊多壘賴在今日猶稱樂郊重以台臺填

撫其地必不虞有他壘者蘖芽其間顯快顯快
王伯安先生宦于斯竊又以卜台臺寤寐之所
存矣

甲子九月初三日

答卓去病

靜養城外甚善大可憂者不在內在內外之間
猝難罄也霍丘之餽適在奉 旨之明日遂發
之然一家哭矣李令君有聲前途定不落莫不
必迴避之例尚俟查之先生寒暑奈何以寒氈

分我謝謝

甲子九月初五日

答周開鴻

槐長至微言年兄所以營葬者頗不能堪也大
事既畢親者無失其爲親而已矣弟滯此弗獲
躬執紼之役恕不可言騎馬長安中見黃花不
勝東籬之想罪我者迫弟使去知我者尼弟使
留不知罪我迫我者之愛我甚于知我也雙南
以素絲之質秉銓近益刻意砥礪謝餽遺爲吾
黨生色閭齊故周練李懋明掖之甚勤定不落
莫也履中此翻弗售動憐才者之歎一切無所

藉弟弟亦未絲少效于履中里中水大當事者
何以拯之

甲子九月初五日

答吳遵菴

來人行在用璽之前救命未能寄也聞已得假
此際悠然在東籬黃菊間矣可勝健羨時事在
邸報中高先生總憲天意應未寂莫耳

甲子九

月初五日

答劉止菴

我兩人作法不異源頭微有不同年兄孳孳以

用小人弟孳孳以化小人年兄細若氣微若聲
以收其用弟福蹙兩岐人時跳而去之所害匪
細則作法又不能不欽服年兄也握別時年兄
以包容二字易弟澄清二字甚感要之澄清云
者澄其濁而使清非另尋清水以易濁水也澄
清卽所以爲包容也何如何如我輩以公心商
榷公事肝膽畢照不在一身意見口舌間何須
絮絮自列耶弟所處輒託詈隨之年兄所到輒
薦剗隨之弟車擲石兄車擲果霄壤相隔不但

如伊川先生之不及家兄已也尊揭斟酌更差
部銜籌邊體優而用廣容與當事商之以副明

命

甲子九月初五日

與袁熙宇

虞廷玄中少華翔公四道長垂顧言貴衙門陞
轉之不可舍俸而不論也若謂資不可越則丙
辰固有越癸丑而陞者矣冢宰掌院時所條上
重差重俸慮資淡者家食養俸而覬陞也若實
有差有俸而必讓之資淡而俸淺者後此舊資

併至實俸益滯矣大意欲以開讀事待賜環者而俸淡者列閏陞事在貴衙門弟不甚諳其頭緒知必斟酌之要于至當也

甲子九月初八日

答王葱嶽

浙江撫院

中間劣無似處非其據賄賄信咸其自取獨若曹借媚竈之人工必勝之着呼吸帝座天發其醜至將振瑾諸奄流毒朝紳故事旁施紅簽以進而萬屯郎斃杖下矣初逗王安二字未逗王體乾三字爲瑞除疾爲瑞卸罪近且聞魯不

奔道路習習謂組成朝士賢否冊潛中之內而後行斯固嚮者元趙官吳劉姚鄒李之所未嘗有也邪焰雖狂正人未散培元解毒全在藥王便中一一密切提撕不肖能告之諸君子也謹軍未有定案而中樞輒引壬午事爲斷無論事體不同卽蛭蛛當年而中樞先有成議播之聽賭地方能厝手乎蓋老公祖之在今日而心獨苦用更妙權衡更審矣練任鴻以浙漕之緩爲慮以湖郡畱賑爲不可其疏當于邸報中見之

其札摘呈計老公祖咄嗟定之無難也江南大水從家鄉來者競云蓄于戊申輔臣有疏周綿老有疏望之老公祖者亦亟矣郡邑視此事或怠多警之地不堪更被之以天蓄望老公祖留意向所請爭田一案第祈如詔釋罪而已茲石帆雅念機不可以再虛也

甲子九月九日

又

書具而老公祖水災之疏下竊爲父老加額尚未見全疏也敝縣居七邑下流其災與松江之

青浦等不知報分數者如何矣

甲子九月初九日

答馬虞生

浙江布政

老公祖榮蒞江邦未獲一候居起辱枉翰貺感
歉交并但計事在邇例當相避不肖更不欲自
食其言敬璧諸使者非敢自外于老公祖也大
水爲菑固天行使然若隄政素脩菑可不害微
老公祖之惠檄諸被菑郡邑乘冬水少濶修築
圩隄田者出粟佃者出力高廣有度每圩擇田
多而有幹者董率之不獨地方永賴亦今冬收

拾饑民之一策也。台駕卽有輯瑞之行，行檄因
易更祈，轉聞于王荊翁、老公祖及水利公祖，一
核其成。印官以此爲殿，最六府之脩，莫先水政。
幸爲地方畱意，不肖竊不勝拳拳。

甲子九月初十日

答沈雲升

承遠念念弟，不一月而幾陷虎口者，再以爲內
庭之基弟者如此，其亟也。基弟者恐不專存內
也。我方魚肉人，方刀俎卽愛弟者，亦自以爲南
山之南北山之北矣。而予孤踪尚在羈縻重

煩記存彌以爲愧

甲子九月初十日

答馮桂海

台臺家視嶺南王銓者遂家台臺于嶺南不出
東西粵也粵之變台臺不及事議茲事者必以
及台臺是不可以已乎時以計事故方面停陞
久之始得林賢以補賓州所以卒難報命也學
使者明春始至台臺司文命于粵東旦晚正未
得弛擔耳然被命之始卽得計大叅儻矣弟處
此未嘗爲終日計似葉之身未有及秋而不黃

隕者辱遠念謝謝

甲子九月十二日

答王麟郊

世道雖似清明而眊眊欲逞者實繁有徒其逞
焉而中誑者不逞之氣更迫同人無日不盱衡
跂翁臺之入朝司斗杓也舞端輿念歸觀自是
至情然無久徘徊于舍矣向諭謂翁臺爲雲中
圖其繼者故不謀之于晉晉撫出家宰獨裁台
翰至業已會推矣謹識之爲王者夾袋儲撫材

也

甲子九月十二日

答魏元白

山東按院

王半老疏至言萬言千言百茫無的據廟堂之上具憂其不足以辨賊東者諸公談虎而色變賊則思盡殲之又恐以殲賊故殲及其良民亦其至情也年兄據李在沭報以爲賊易與耳而王半老則疏叅在沭同人竊疑撫按之不無異同相率爲年兄左袒不意反重年兄之愆年兄叙功一疏稍輕含真劾宋司理稍過大抵宋司理中庸人耳若舊汶上一事年兄自不負心弟

自爲計與守法偶爲顯用及之因泯然無迹也
豈有間焉一劫事年兄夷氣應之細心審之其
得及于繡衣之耳者未有不選言而入者也百
惟慎重無萌去思真切真切 甲子九月十三日

與連在治 嘉興三府

臺下爲民運良苦僕碌碌未得遠逝江干也敵
邑二號九號有失風之既怙臺下如父母矣協
濟一說必有得其證據者來呈奉上每年剝船
常爲猾者偷賣而弱者若後若剝船到即總

計分撥強者不得先弱者不得後弱者不得賣
乃可蚤竣事爲臺下叙運功也伏惟台俞諸圖
面候不宣

甲子九月十三日

答胡泰六

羊城亂作翁臺已拜陪京大司寇之命矣汲汲
焉若不能以終日殲其爲亂者糾其不立靖茲
亂以底于不靖者而不以其亂貽後之人乃不
知翁者謂白艚故東粵之大利大害也翁臺數
年于粵而養之以至今日何人情之好求多也

然何損于翁臺矣粵中吏習慣見金夫有志者
恒謂是姑臧焉而厭之而不敢近翁臺澄之汰
之不少怒吏治蒸蒸矣方面以羊城故槩不以
從白簡愈以見翁臺之寬大也所論粵以西者
謹識之徐觀輿論如何耳

甲子九月十四日

與朱恒巖

四川樵院

佛圖之變起於不虞乃遣使之初不肖卽虞其
有此今不敢矜其言之中也天幸惠蜀人覲之
駕未遑其行百日之守幾於墨翟錦官城不淪

爲腥土伊誰之勅耶顧諸郡邑稍見還聚而其
間僂辱焚掠驅逼仇離之象痛定之餘寧堪入
夢矣逋孽雖已歸巢不聞苟活艸間而雄行如
故重慶生齒日受夷鋤幾無噍類道路流傳近
戕四孝廉以狗而突圍而出劔我兵者萬餘果
其未悔禍也如是耶突賊未俘問罪之師焉能
直抵奢穴保寧去彼中幾舍便於呼應否蜀去
天遠乞西江之水爲艱然可以一意地方而無
虞於掣肘則亦至難中之至幸也西南半壁專

倚長城傾耳而聽黔蜀之露布不盡

甲子九月十四日

與孫若英

暫屈得無缺缺秋風黃葉遠道三千佳句應不
寂莫也進賢冠滋味弟視之不如冠反注時大
賢宜有別解對此塵鞅耳

藏密齋集卷之二十一終